

# 校註婦人良方

宋 臨川 陳自明良甫編輯  
明 古吳 薛 己立齋補註

鄞縣 曹赤電炳章圈校

## 卷七

### 婦人嘔吐方論第一

婦人嘔吐。良由脾胃不調。外邪乘之。或胃中虛冷。或胃口有熱。或中脘停痰。或胃經血弱。治法胃冷者。丁香散。理中丸。胃熱者。小柴胡湯。竹茹湯。胃虛者。藿香正氣散。停痰者。半夏茯苓湯。二陳湯。血虛者。十全大補湯。加陳皮。半夏。藿香。

愚按東垣先生云。前症內有故寒與新穀俱入於胃。新故真邪相攻。氣併相逆。復出於胃。故爲噦。補手太陰。瀉足少陰。又云。胃因氣逆爲噦。夫嘔吐噦者。俱屬於胃。以其氣血多少爲異耳。如嘔者。陽明也。陽明多血多氣。故有聲有物。血氣

俱病也。仲景云。嘔多雖有陽明症。慎不可下。孫真人云。嘔家多服生薑。爲嘔家之聖藥也。氣逆者。必散之。故以生薑爲主。吐者太陽也。太陽多血少氣。故有物無聲。爲血病也。有食入則吐。以橘皮去白主之。噦者少陽也。多氣少血。故有聲無物。乃氣病也。以薑製半夏爲主。若脾胃虛弱。寒邪所客。飲食所傷者。用六君子。藿香。生薑之類。若胃中有熱。膈上有痰。用二陳。山梔。黃連。生薑。若久病胃虛。嘔而不納穀者。用生薑。參。朮。黃耆。香附之類。亦有痰膈中焦。食不得下者。有氣逆而嘔者。有氣鬱於胃口。有食滯於心肺之分而復出者。有胃口有火與痰而嘔者。若注船大吐渴飲水者。冲童便飲之最妙。前論云。血不歸源而嘔。用十全大補湯。誠發前人之未發。愚常用屢效。此論與王安道先生脈通集所論少異。仍宜參看之。

附治驗

太守陽山之內。素善怒。胸膈不利。吐痰甚多。吞酸噯腐。飲食少思。手足發熱數年矣。所服非芩。連。枳實。必檳。蘇。厚朴。左關弦洪。右關弦數。此肝火血燥。木乘土位。朝用六味地黃丸。以滋養肝水。夕用六君。歸。芍。以調補脾土而愈。乙巳夏。因大怒。吞酸噯腐。胸腹脹滿。或用二陳。石膏治之。吐涎如湧。外熱如灼。脈洪大。按之

如無。余曰。此脾胃虛損。虛陽發越於外。脾敗而涎泛出也。用六君。加薑桂一鍾。即睡覺而諸症如失。又數劑而康。

先太宜人飲食後。聞外言忤意。嘔吐酸水。內熱作渴。惟飲冷水。氣口脈大而無倫。面色青赤。此肝脾鬱火。投之以藥。入口即吐。第三日吐宿食。第七日吐酸黃水。十一日吐苦水。脈亦洪大。仍喜飲冷。以黃連煎湯。冷飲少許。至二十日。加白朮。茯苓。二十五日。加陳皮。二十七日。加當歸。炙草。至六十日。始進米飲半盞。漸進薄粥。調理即痊。

一婦人食後因怒。患噎嘔吐。用藿香正氣散而愈。後復怒吐痰。狂言熱熾。胸膈脹痛。手按少得。脈大無倫。按之微細。此屬肝脾二經血虛。以加味逍遙散。加熟地。川芎二劑。脈症頓退。再用十全大補湯而安矣。府庠沈姬文母。患脾虛中滿。痰嗽發熱。又食濕麵冷茶。吞酸嘔吐絕食。誤服芩連。青皮等藥。益加寒熱。口乾流涎不收。聞食則嘔。數日矣。迎治。余曰。脾主涎。此脾虛不能約制也。欲用人參安胃散。惑於衆論。以爲胃經實火。宿食治之。病日增劇。忽思冬瓜。食如指甲一塊。頓發嘔吐酸水不止。仍服前藥愈劇。復邀視之。則神脫脈絕。瀕死矣。惟目睛尙

動。余曰。寒淫於內。治以辛熱。然藥不能下矣。急用鹽艾。附子炒熱熨臍腹。以散寒回陽。又以口氣補接母口之氣。又以附子作餅。熱貼臍間。時許。神氣少生。以參朮附子爲末。仍以是藥加陳皮煎膏爲丸。如粟米大。入五七粒於口。隨津液嚥下。卽不嘔。二日後。加至十粒。諸病少退。其涎不止。五日後。漸服前劑一二匙。胃氣少復。乃思粥飲。後投以參朮等藥。溫補脾胃。五十餘劑而愈。

丁香散 治脾胃氣弱嘔吐。水穀不入。

丁香

白朮

縮砂

草果各三錢

人參一兩

當歸

白豆蔻

藿香

甘草各半兩

橘皮三分

神麴炒

訶子各半兩

右爲末。每服二錢。薑棗湯調。

竹茹湯 治胃熱嘔吐。

乾葛二錢

半夏薑製三錢

甘草五分

竹茹一彈指

右薑棗水煎服。

許學士先生云。胃熱者。手足心熱也。政和中。一宗人病傷寒。得汗身涼。數日。忽

嘔吐藥。食不下。用丁香。藿香。滑石等藥。下咽卽吐。余曰。此正汗後餘熱留胃脘。正宜竹茹湯。用之卽愈。

許仁貼半夏丸。治胃冷嘔逆不食。

半夏洗去骨一斤。小麥麵一斤。

右水和丸。如彈子大。水煮熟。初服四五丸。二服加至十四五丸。旋煮間服。

七味人參丸。服前丸不應。可服此藥。

人參 白朮各五兩 厚朴薑製 細辛各四兩

生薑 橘皮三兩 桂心一兩

右爲末。煉蜜丸。桐子大米飲下十九丸。漸加至二十丸。

青金丸。治嘔吐不已。

硫黃三錢 水銀一錢

右入銚內。慢火化。以木片攪炒成砂。研至黑。不見白星。薑汁糊丸。菉豆大。每服二三十丸。米飲下。

附方

人參安胃散 治脾胃虛熱。嘔吐泄瀉。或飲食不入。

人參 一錢

黃耆 二錢

生甘草

炙甘草 各五分

白芍藥 七分

白茯苓 四分

陳皮 三分

黃連 二錢

右水煎服。

六君子湯

方見二十四卷第六論

加味逍遙散

十全大補湯

方見二十四卷第四論

六味丸

方見二十四卷第十一論

藿香正氣散

方見二十四卷第九論

## 婦人霍亂方論第二

論曰。嘔吐而利者。名霍亂也。因腸胃虛弱。飲食過度。觸冒風冷。清濁相干所致。或先腹痛而吐。或先吐而痛。或吐利並作。當分寒熱而治之。飲冷者。五苓散。飲湯者。理中丸。四肢逆冷。脈微細者。用通脈四逆湯。加猪膽汁。中暑霍亂。煩渴飲冷。轉筋者。用香薷散。脈浮洪者。易治。微遲者。難治。

愚按。賈元良先生云。暑者相火行令也。夏月人感之。自口齒而入。傷心胞絡之經。其症頭疼口乾。面垢自汗。倦怠少氣。或背寒惡熱。甚者迷悶不省。或霍亂吐

利。嘔痰腹痛。或下血發黃生斑等症。治法清心火利小便爲主。若自汗熱甚。用白虎湯。若頭疼惡寒。用十味香薷散。泄瀉煩渴。飲水吐逆。用五苓散。熱甚煩渴。用益元散清之。若表解裏熱甚者。用黃連解毒湯。脈微下利。作渴喜溫。或厥冷不省人事。宜竹葉石膏湯。加熟附半枚冷飲。次以承氣湯。五苓散治之。故東垣云。脾胃虛弱。遇夏月淫雨。身重短氣。甚則四肢痿軟。脚軟眼黑。當滋肺氣。以補水之源。是以五月常服五味子人參麥門冬之劑。爲熱傷元氣故耳。丹溪所謂夏月伏陰在內也。蓋人之腹屬地。已月六陽盡出於地之上矣。是人之陽氣亦浮於肌表。散於皮毛。而腹中之陽虛矣。又加以涼臺水館。大扇風車。寒泉水果。冰涼之物。自內及外。不用溫熱。病所由生。陳無擇云。凡中暍。切不得用冷藥。惟用溫養得冷卽死。道途無湯。卽以熱土熨臍中。溺以熱尿卽甦。概可見矣。內經曰。脈虛身熱。得之傷暑。難經云。傷暑得之爲正邪。火自病也。當惡臭。其病身熱而煩。心痛。其脈浮大而散。傷寒論曰。太陽中暍者。身熱疼痛。而脈微弱。或發熱惡寒。而脈微細。遲。大抵寒傷形。熱傷氣。蓋傷氣而不傷形。則氣消而脈虛弱。故先哲立法。夏月宜補。良有以也。前症若內有所積。外有所感。用二陳湯加減。

治之。或蘿蔔子搗碎。服而吐之。若飲米湯。卽死云云。同前論若轉筋不住。男子以手挽陰。女子以手牽乳。近兩邊。此千金妙法也。乾霍亂不得升降。死在須臾。當以鹽湯吐之。後以二陳湯加川芎。蒼朮。防風。白芷。薑煎服。若登園而不通。加枳殼。若食瓜果飲冷。乘風霍亂。用六和湯。倍加藿香。凡中暑而亡者。皆因元氣虛弱。而暑熱乘之。以致泄瀉。陽氣暴脫。實爲陰寒之症。宜急補其陽。庶得保生。緩則不救。其他執爲暑熱。投以寒藥。鮮不誤事。愚皆以回陽固本之方。繼之於後。

附治驗

進士李通甫之內。冬開衣箱。其內衣裳。乃夏月所晒者。開時覺暑氣所侵。良久患霍亂。足指足跟。俱轉筋甚惡。自分必死。用香薷飲一劑。急煎下咽卽愈。

加減理中丸 治肚腹疼痛。手足逆冷。飲食不入等症。

人參

白朮

乾薑

甘草

各等分

右爲末。煉蜜杵勻。每兩作五丸。每服一丸。白湯化下。嘔吐。加枳殼。泄瀉。加乾薑。吐瀉乾嘔。加半夏。體冷微汗腹寒。加炮附子。水煎服。

四順附子湯 治霍亂吐利腹痛。手足厥冷。脈微絕。方見八卷十一論

四逆湯加猪膽汁。名四逆猪膽汁湯。

甘草三兩 乾薑三兩 附子生一枚

右每服五錢。水煎。入猪膽汁半合。作二服。

香薷散 治吐利腹痛。發熱頭痛。或霍亂轉筋拘急。

香薷二錢 白扁豆 厚朴薑製 茯苓各一

右水煎。冷服。連進二三劑。加黃連。名黃連香薷飲。

### 附方

十味香薷散 治伏暑身體倦怠。頭痛惡寒。或吐瀉等症。

香薷一兩 人參 陳皮 白朮炒

茯苓 黃耆炒 木瓜不犯鐵器 厚朴薑製

扁豆 甘草炒

右每服一兩。水煎。

清暑益氣湯 治長夏濕熱所蒸。四肢困倦。精神短少。懶於動作。胸滿氣促。支節

作疼。或氣高而喘。身熱而煩。心下膨悶。小便黃數。大便澹頻。或瀉利作渴。不思飲食。自汗體重。

黃耆炒

蒼朮

升麻各一錢

人參

白朮

神麴炒

陳皮各五分

甘草炙

黃柏炒

麥門冬去心

當歸各三錢

葛根二分

五味子炒

澤瀉五分

青皮二分

右水煎服。

白虎湯 治胃熱作渴。暑熱尤效。又治熱厥腹滿。身難轉側。面垢譫語。不時遺溺。

手足厥冷。自汗脈沉滑。

知母

石膏各二錢

粳米半合

右水煎服。

人參白虎湯 治暑熱發渴。脈虛等症。

人參五錢

知母二錢

石膏半兩

甘草一錢

右入粳米一合。水煎服。

人參益氣湯 治暑熱傷氣。四肢困倦。嗜臥少食。兩手指麻木。

黃耆錢炒入

甘草七錢內炙二錢

人參半兩

升麻一錢

白芍藥錢炒三

五味百四十個并炒

柴胡五錢

右咬咀。分作四服。

大順散 治冒暑伏熱。引飲過多。脾胃受濕。水穀不分。清濁相干。陰陽氣逆。霍亂嘔吐。臟腑不調。

甘草炒

乾薑炮

杏仁去皮炒

桂去皮

右爲末。每服二三錢。湯點服。

消暑丸 治傷暑發熱頭疼。或嘔吐泄瀉。二便不分。

半夏

甘草炒

茯苓各半

右爲末。生薑汁和丸。桐子大。每五十丸。水下。易簡方。薑汁。好醋煮半夏末。作糊丸服。

薑附湯 治霍亂轉筋。手足厥冷。汗出嘔逆。腹痛脈欲絕者。

乾薑炮一兩

附子一個生用

右爲末。每服五錢。水煎服。

通脈四逆湯 治霍亂惡寒。腹痛身冷。自汗。脈沉微如欲絕。

吳茱萸二兩 炒

附子一兩 炮

桂心

通草

細辛

白芍藥炒

甘草炙各 半兩

當歸三錢

右每服四錢。水酒生薑煎。如不應。更加倍服之。以效爲度。

半夏解毒湯 治一切暑熱毒。五心煩躁。口舌咽乾。

黃柏炒

黃芩炒

山梔子炒

半夏等分

右每服五錢。水煎。

六和湯 治冒暑伏熱。煩悶。霍亂轉筋。吐瀉。寒熱交作。頭目昏痛。嗜臥倦怠。小便

赤澀。不問胎產並服之。

縮砂

半夏湯炮

杏仁去皮

人參

甘草炙各 一兩

赤茯苓

藿香

木瓜各二 兩

白扁豆薑汁 略炒

香薷

厚朴薑製各 四兩

右每服一兩。薑棗水煎服。

益元散 治中暑身熱。小便不利。或發熱體痛。口乾作渴。

滑石六兩 甘草微炒一兩

右爲末。每服三錢。加蜜少許。湯水任下。

二陳湯 方見二十四卷第五論

來復丹

五苓散 二方見二十四卷第十論

竹葉石膏湯 方見十二卷第十論

### 婦人翻胃吐食方論第三 增新

愚按病機云。前症有三。曰氣積寒也。皆從三焦論之。上焦吐者。分於氣。氣者天之陽也。其脈浮而洪。食已暴吐。渴欲飲水。大便秘結。氣上衝胸發痛。其治法當降氣和中。中焦吐者。從於積。有陰有陽。食與氣相假爲積而痛。其脈浮而匿。其症或先痛而後吐。或吐而後作痛。治法當以小毒藥去其積。檳榔、木香行其氣。下焦吐者。心下寒地之道也。其脈沉而遲。其症朝食暮吐。暮食朝吐。小便清。大便秘而不通。治法當以毒藥通其閉塞。溫其寒氣。大便秘通。復以中焦藥和之。不令大便秘結而自愈也。王太僕曰。食不得入。是有火也。食入反出。是無火也。

又發明曰。噎者六腑之所主。陽也。氣也。塞者五臟之所主。陰也。血也。二者皆由陰中伏火而作也。劉宗厚先生曰。若三焦傳化失常所致。主於氣也。若血虧胃脘乾槁所致。因於血也。塞猶填塞不通之義。故發明有治幽門不通。噎塞不便。通幽湯例。蓋陽無陰不能通化。陰之失位而陽伏其中。傳化不變。而反上行矣。故前症或由飲食起居。七情虧損脾胃。痰飲停滯。中氣不運。當以補中益氣湯爲主。若鬱結傷脾。用歸脾湯加枳殼。桔梗。若恚怒傷肝。用小柴胡加梔。芩。參。朮。脾氣虛弱。用六君加山梔。枳殼。氣血俱虛。用八珍湯加山梔。半夏。若用行氣之藥。胸膈痞悶。用六君。芎。歸之類。若過用香燥之劑。而大便結燥。用四物。參。朮之類。若飲食不能入。用六君。山梔。吳茱萸。製黃連。若食入而反出。用六君。炮薑。白豆蔻。黃連。製吳茱萸。若痰滯而食反出。用六君。枳殼。桔梗。若飲食少思。大便不實。胸膈痞悶。吞酸噯腐。食反不化。是爲脾胃虛寒。用東垣固真丸。或八味丸。若發熱煩熱。身惡風寒。腹畏熱食。或手足俱冷。胸滿腹脹。是內真寒外假熱。用神效附子丸。或八味丸。大凡嘔吐善食。喜飲冷水。是爲有火。嘔吐少食。喜飲熱湯。是爲無火。當審其因而治之。

附治驗

一婦人患前症。胸腹痞悶。得去後。或泄氣稍寬。余曰。此屬脾氣鬱結而虛弱也。當調補爲善。不信。乃別用二陳。枳實。黃連之類。不應。又用香燥破氣。前症益甚。形氣愈虛。余用加味歸脾湯調治。不出半載而痊。

一婦人患前症。胸腹脹悶。或小腹不利。或時作痛。小便滯滯。余曰。此肝火血虛也。當清肝火。生肝血。養脾土。生肺金。以余言爲迂。別服利氣化痰等劑。前症益劇。虛症蠱起。余用加味逍遙散。加味歸脾湯兼服。尋愈。

一婦人患吐痰甚多。手足常冷。飲食少思。余曰。此肝脾鬱怒。兼命門火衰。不信。另服化痰利氣之劑。胸腹愈脹。又服峻利疎導之劑。余曰。非其治也。必變脾虛發腫之症。急服金匱加減腎氣丸。庶有可救。仍不信。反服沉香化氣等丸。果發腫而歿。

白堊散。治虛熱翻胃。用白堊土一斤。米醋一斤。煨土赤。入醋內。再煨再入。以醋乾爲度。取土一兩。入炮薑一錢爲末。每服一錢。米飲下。甚者二錢。須服四兩有效。

治實熱翻胃。用黃連五錢。生薑汁浸炒。山查三錢。保和丸三錢。同爲末。糊丸麻子大。胭脂爲衣。每服六十丸。煎人參湯入竹瀝下之。

太倉丸

治胃弱翻胃。

肉豆蔻

砂仁各一兩

丁香一兩

陳蒼朮七升

右爲末。薑汁糊丸。桐子大。每服六七十丸。薑湯下。

青金丹

每服三十九。生薑陳皮煎湯送下。方見前。

附方

東垣補真丸

肉苁蓉酒浸

葫蘆巴炒

附子炮去

陽起石煨

肉豆蔻煨

兔絲子淨洗酒

川烏炮去

沉香

五味子錢各五

鹿茸酒浸

巴戟去心

鍾乳粉各一

右爲末。用羊腰子兩對。治如食法。葱椒酒煮搗爛。入酒糊丸。如桐子大。每服七

十丸。空心。米飲。鹽湯任下。

神效附子丸 治脾腎虛寒嘔吐。或翻胃膈噎。用黑附子重一兩四五錢。端正底

平尖圓一枚。灰火炮皮裂。入生薑自然汁內。浸潤曬乾。再炮。再入汁浸潤。仍曬再炮。用盡薑汁半碗爲度。却去皮臍爲末。以人參煎膏丸黍米大。每服數丸。津唾嚥下。胃氣稍復。飲食稍進。投以溫補之劑。

六君子湯

補中益氣湯

四物湯三方見二十四卷第六論

歸脾湯

加味歸脾湯

八珍湯

加味逍遙散

四方見二十四卷第四論 八味丸方見二十四卷第十一論

二陳湯

方見二十四卷第五論

金匱加減腎氣丸

方見二十二卷第十論

## 婦人血膈方論第四

愚按前症若氣逆而血滯。用流氣飲。若恚怒而血逆。用小柴胡、山梔、丹皮、血虛用四物、參朮、柴胡、山梔、丹皮。若鬱結而血傷。用加味歸脾。兼加味逍遙散。脾虛不能生血。用六君、歸、芎。胃虛不能吐血。用益氣湯。若肝虛而不能藏血。用補肝散。如不應。兼以六味丸。若因脾肺虛。用補中益氣湯。如不應。用六君加味湯。

### 附治驗